

Dörfligeischer 1991

Mit Canal 3 bisch immer dabei,
Ou bir Aare-Schiffli-Fahrerei,
Zmitts im Interwiau, e Krach, e Schrei,
Dä Kahn dä hüpf i d' Uferstei',
Das hett jo so müesse usecho
Bi dene Froge, wo die hei useglo !

Der Schänk hett ds Olten ds Hüetli gno,
In Biel der Kinding äbeso,
Dir gseht, im Sport, wenn's nümm' guet geit,
Tuet der Trainer go, oder wird usegheit.
Nur im Gmeinrat ds Biel, das macht üs z' schwitze,
Chläbe si viel z' lang uf ihre Sitze !

Trätet dir im Morgerock daher,
De gseht me euch im Näbumeer,
Füüfzähnhundert Johr tüe mir hür fiire,
Dir danket jetz sicher, was tüe die liire,
700 jährig wird üsi Schwiz,
800 Bärn, das isch kei Witz,
Wie's hüt usgseht, das isch eso,
Sött me gschieder wieder vor' afo !

Mir wei üser Grossmueter gratuliere,
I drü Johr cha si der Nünzigscht fiire.
Mir gä hüt dä Glückwunsch pär PTT
Als Zwöitklass-Brief, wie dir chöit gseh,
Und hoffe, dass üses Liebeszeiche
Ds Grosi no zitig tuet erreiche !

Der Mändu Fehr, s'isch allne bekannt,
Är hett sech gschürtzt i ds nöie Amt,
Als früsch bachne Regierigsrat,
Macht är zum Zug us der Spagat,
Und tuet grad, statt go Akte zeue,
Kontakt ufnäh mit de lisebahn-Schweue !

Si spare bi der SRG,
Und verlange für dä Mischd gäng meh,
Ab sofort wärde mir no meh
Wiederholige vo Wiederholige gseh,
Drum lö mir der Fernseh und ds Radio lo si,
Und figuretle mit em Schätzeli !

P26 heisst die Gheimarmee,
Vo dene git's doch sicher no meh,
Ou mir Geischer tüe üs jetz bekenne
Und ab sofort P111 üs nenne,
Denn mir danke scho a üsi Zuekunft
Und gründe e gheimi Faschingszunft !

Wie mängisch heit dir e Stange gsoffe ?
Wie mängisch heit dir eues Schätzli troffe ?
Wie mängisch sit dir i ds Bettli ghüpft ?
Wie mängisch heit dir die Alti erchlüpft ?
Wie fliessig wächslet dir eui Socke ?
Wie lang tüet dir uf der Schiissi hocke ?
Frooge, Frooge, nüt als Frooge,
Wo üs Schwizer no im Näscht tüe plooge,
Dir wüsst nid, wie froh mir jetze si,
Ändlech isch die Volkszählig verbi !

Fidiri-fidira-fidirallalla,
Jupeidi und jupeida,
Trulla-trulla-trulla-la,
Fidiri-fidira-fidi-hoppsassa,
Dasch nid Canal 3, wo redt so gschört,
Das hei mer im Bieler Stadtrat ghört !